

四庫全書

史部

欽定四庫全書

蜀鑑卷五

宋 郭允蹈 撰

江左不用蜀

晉咸康元年詔建威將軍司馬勲將兵安集漢中漢主壽擊敗之壽遂置漢中守宰城南鄭而還

永和三年荊州刺史桓溫伐蜀取之蜀故將鄧定隗文等反入據成都征虜將軍楊謙棄涪城走保德陽

涪城今綿州德陽今遂寧府

永和四年益州刺史周撫擊賁斬之益州平

賁范良生之子隗文等立為帝

梁州刺史司馬勲出駱谷破趙長城戍壁於懸鈎

趙主石虎死國亂雍州豪傑遣使告晉司馬勲帥眾
赴之勲出駱谷破趙長城戍壁於懸鈎去長安二百
里使治中劉煥攻長安斬京兆太守劉季離又拔賀
城三輔豪傑多殺守令以應勲凡三十餘壁眾五萬

餘人 水經注渭水之東駱谷之水出其南山洛谷
水北流逕長城西

司馬勲釋懸鉤拔宛城殺趙南陽太守袁景復還梁州
宛城南陽縣

永和十年桓溫大舉伐秦遣司馬勲出子午道

溫統步騎四萬發江陵水軍自襄陽入均口至南鄉
步兵自淅川趨武關 子午道從杜陵徑漢中均口
南鄉淅川皆在今鄧州武關今商州春秋左傳哀公

四年少習即武關也

司馬勲掠秦西鄙

桓溫別將進擊青泥城破之涼秦州刺史王擢攻陳倉以應溫秦主健遣太子萇等帥衆五萬軍於嶢柳以拒溫夏四月己亥溫與秦兵戰於藍田大敗之桓冲又敗秦丞相雄於白鹿原溫至灞上秦太子萇退屯河南秦主健與老弱六千固守長安小城悉發精兵與萇合兵以拒溫三輔郡縣皆來降耆老有垂泣

者曰不圖今日復見官軍 泥水水經注北歷嶢柳
城魏置青泥軍於城內故謂之青泥城即嶢柳關亦
名藍田關白鹿原三秦記云周平王東遷之後有白
鹿遊此因得名並在京兆府藍田縣

秦丞相雄帥騎七千襲司馬勲於子午谷破之勲退屯
女媧堡

女媧堡寰宇記云藍田山有女媧氏谷或云今金州
有女媧山非也

秦丞相雄擊司馬勲於陳倉勲奔漢中

王猛謂溫曰公不遠數千里深入敵境長安咫尺而不度灞水百姓未知公心是以不至溫兵不利溫指秦麥以為糧既而秦人芟麥清野以待之溫軍乏食六月徙關中三千餘戶而歸司馬勲自陳倉中奔漢中涼秦州刺史王擢亦奔畧陽灞水出京兆府萬年縣灞城秦繆公所築

哀帝興寧三年益州刺史周撫卒以其子犍為太守楚

代之

撫在益州三十餘年甚有威惠

梁州刺史司馬勲舉兵反圍周楚於成都大司馬溫遣朱序救之

勲常有據蜀之志憚周撫不敢發及撫卒遂舉兵反引兵入劍閣圍周楚於成都

海西公太和元年荊州刺史桓豁遣桓胤攻南鄭討司馬勲朱序周楚擊司馬勲獲之大司馬溫斬勲傳首建

康

簡文帝咸安元年益州刺史周楚卒以寧州刺史周仲孫為益州刺史

大司馬溫以梁益多寇周氏世有威名乃以周仲孫代楚守蜀

孝武帝寧康元年秋七月大司馬溫薨

論曰晉室南渡中原非復晉有猶曰五胡崛起力未易支也若夫吳蜀唇齒之邦孫劉連衡用之以抗曹

魏足矣桓溫之取蜀也擇忠信之長嚴毅之帥藩蒞其生齒教誨其人民招集其流離驅逐其蠹賊庶幾積年之汙俗咸與惟新然後命一將以出秦川而自將以向宛洛孔明之志庶幾少伸矣哉軍至灞上徒出而歸司馬勲犄角之師曾何足仗西土之憂未艾也溫死而苻堅得蜀矣堅冰之漸信乎

苻堅取蜀

晉寧康元年秦王堅使王統朱彤帥卒二萬出漢川毛

嘗徐成帥卒三萬出劍門入寇梁益

梁州刺史楊亮帥巴獠萬餘拒之戰於青谷亮兵敗奔
西城彤遂拔漢中徐成攻劍門克之

青谷未詳西城今金州劍門今隆慶府

秦梁州刺史楊安進攻梓潼太守周虓守涪城母為朱
彤所獲虓遂降於安安克梓潼

荊州刺史桓豁遣江夏相竺瑤救梁益瑤聞廣漢太守
趙長死引兵退益州刺史周仲孫勒兵至綿竹帥騎五

千奔於南中

秦遂取梁益二州印笮夜郎皆附於秦仲孫坐失守

免官

秦苻堅以楊安為益州牧鎮成都毛當為梁州刺史鎮
漢中姚萇為寧州刺史屯墊江王統為南秦州刺史鎮
仇池

墊江今合州仇池今成州

桓冲以毛虎生為益州刺史領建平太守以虎生子球

卷五
為梓潼太守虎生與球伐秦至巴西以糧乏退屯巴東
建平今歸州巴西治今閬州巴東治今夔州

寧康二年蜀人張育楊光起兵擊秦遣使來請兵秦王
堅遣鄧羌討之

益州刺史竺瑶威遠將軍桓石虔帥衆二萬及墊江姚
萇兵敗退屯五城瑶石虔屯巴東

五城今潼州府中江縣晉屬廣漢即縣有五城山故
名臧宮破延岑亦於此地

張育與巴獠酋帥張重尹萬等五萬餘人進圍成都秦
楊安鄧羌襲育敗之八月鄧羌敗晉兵於涪西楊安敗
張重尹萬於成都南重死斬首二萬三千級鄧羌擊張
育楊光於綿竹皆斬之

益州復入於秦 苻堅雖得蜀而夔路未嘗失所以
晉不久復得之也

晉孝武太元三年秦梁州刺史韋鍾圖魏興太守吉挹
於西城

秦既得蜀遣長樂公丕等攻襄陽明年拔之韋鍾遂圍西城魏興在今金州治西城縣

太元四年右將軍毛虎生帥衆三萬擊巴中以救魏興秦將張紹等敗之虎生退屯巴東韋鍾拔魏興吉挹死之

寰宇記吉挹為梁州督為苻堅所敗於縣南九里依山築城攻圍不下名吉挹城巴中今夔路巴東今夔

州

太元六年秦王堅以裴元畧為巴西梓潼郡太守使密具舟師

穆帝永和三年梓潼郡偽置巴西治今綿州苻堅因之

太元八年十一月苻堅入寇大敗於淝水

晉復取蜀

太元八年夏五月元冲帥衆十萬伐秦遣輔國將軍楊亮攻蜀拔五城進攻涪城秦遣張蚝姚萇救涪城張蚝

出斜谷亮引兵還桓冲數伐秦蜀無功而還但拔蜀兩邑
五城今潼州府中江縣涪今綿州

太元九年梁州刺史楊亮帥衆五萬伐蜀遣巴西太守
費統等將水陸兵三萬為前鋒亮屯巴郡秦遣王廣康
回拒之

巴郡治今重慶府巴縣

姚萇擊秦王堅秦益州刺史王廣遣將軍王蚝帥蜀漢
之衆三萬北救長安

秦梁州刺史潘猛棄漢中奔長安

太元十年秦益州刺史王廣以李丕為益州刺史守成都廣帥所部奔還隴西蜀人隨之者三萬餘人

丕蜀人為江陽太守 秦政方亂而蜀人之歸秦者三萬人以夷獠亂其城邑而晉不暇謀也

蜀郡太守任權攻拔成都斬秦刺史李丕復取益州以廣州刺史羅友為益州刺史鎮成都

裕討譙縱

晉安帝元興二年桓玄僭位益州刺史毛璩傳檄遠近
討之進屯白帝

玄僭位遣使加璩散騎常侍璩執留玄使不受其命
玄以桓希成三巴以備之璩傳檄遠近列玄罪狀遣
建平太守羅述征虜司馬甄季之擊破希等仍率衆
次於白帝 白帝今夔州

毛修之及馮遷斬玄於江陵

玄以乘輿幸江陵將之漢中屯騎校尉毛修之璩之

弟子也誘玄入蜀遂與毛祐之費恬擊玄益州督護
漢嘉人馮遷抽刀斬玄乘輿反正於江陵

桓振復陷江陵

毛璩遣將攻漢中斬桓希

義熙元年毛璩帥衆三萬順流東下討桓振璩遣其弟
瑾出外水參軍譙縱反殺毛瑾於涪城璩還成都為縱
等所殺

毛璩遣其弟瑾瑗出外水參軍譙縱侯暉出涪水蜀

人不樂遠征暉至五城水口謀作亂縱為人和謹蜀人愛之共逼縱為主縱不可走投於水引出之共逼縱登輿縱又投地固辭暉縛縱於輿襲毛瑾於涪城殺之璩至畧城聞變奔還成都益州營戶李騰聞城納縱共殺璩及弟瑗又外水今大江也庾仲雍云江州縣對二水口右則涪內水左則蜀外水內外水之所以名也江州縣即今重慶府涪水水經云出廣魏涪縣至小廣魏南入於墊江所謂內水也涪今綿州

墊江今合州內水之源委也五城水口在郵縣今中江縣水也中江縣自有一水入於涪即廣漢枝水廣漢郡有沈水臧宮嘗破延岑於此水水經注云江水又東絕綿洛逕五城界至廣都北岸南入於江謂之五城水口此甚誤江水未嘗絕綿洛又逕五城而至廣都涪水亦未嘗逕五城與綿洛初無相干廣都乃在五城之上非下流也舛誤甚矣大抵蜀自後漢以來由廣漢而下涪水多逕五城亦爭戰之地今中江

縣也

義熙二年益州刺史司馬榮期擊譙明子於白帝破之
譙縱以弟洪為益州刺史明子為巴州刺史屯白帝
劉裕遣龍驤將軍毛修之將兵與司馬榮期等討之修
之至宕渠榮期為參軍楊承祖所殺修之退還白帝

宕渠宋於墊江置東宕渠郡今合州

義熙三年毛修之與漢嘉太守馮遷擊楊承祖斬之

馮遷漢嘉人手刃桓玄者為鄉郡太守

劉裕表襄城太守劉敬宣伐蜀以劉道規為征蜀都督
義熙四年劉敬宣與諸將至黃虎譙縱譙道福拒之敬
宣引軍還

劉敬宣既入峽遣巴東太守溫祚以二千人出外水
自帥益州刺史鮑陋及將軍文處茂時延祖等由墊
江轉戰而前譙縱求救於秦秦王興遣姚賞王敏將
兵二萬赴之敬宣軍至黃虎去成都五百里縱遣譙
道福悉衆拒險相持六十餘日敬宣不得進食盡軍

中疾疫死者大半乃引軍還 黃虎在今潼州府通
泉縣寰宇記云有黃澗州

義熙六年譙縱遣桓謙譙道福寇荊州刺史劉道
規大破之於枝江

謙等大陳舟師兼以步騎戰於枝江檀道濟先進陷
陳謙等大敗道規追斬謙 枝江今江陵府枝江縣
譙道福陷巴東益州刺史鮑陋卒道福陷巴東殺守
將溫祚時延祖 巴東今夔州

義熙八年太尉劉裕以朱齡石為益州刺史帥臧熹劉鍾等伐蜀

義熙九年六月朱齡石從外水入成都臧熹從中水入廣漢

裕與齡石密謀進取曰劉敬宣往年出黃虎無功而退賊謂我今應從外水往而料我當出其不意猶從內水來也如此必以重兵守涪城以備內道若向黃虎正隨其計今以大衆自外水取成都疑兵出內水

此制敵之奇也裕慮此聲先馳賊知虛實別有函書封付齡石曰至白帝乃開朱齡石等至白帝發函書曰衆軍悉從外水取成都臧熹從中水取廣漢老弱乘高艦十餘從內水向黃虎於是諸軍倍道兼行外水都江水自江陽南安平模入成都內水涪水自江墊江德陽黃虎上涪中水發源為綿洛湔三水自江陽沂流上富義資中牛鞞上廣漢

論曰劉裕之發函書即岑彭自墊江還江州沂都江

上武陽之故智也

譙道福鎮涪城

以備內外

譙縱遣侯暉譙詵帥衆萬餘屯平模朱齡石帥諸軍攻克之

齡石至平模去成都二百里侯暉譙詵夾岸築城以拒之齡石以天時甚熱欲養銳息兵劉鍾曰不然賊阻兵守險者懼不敢戰也盡銳攻之其勢必克若緩

兵相守彼知人虛實譙道福以涪軍來我求戰不獲
軍食無資二萬餘人悉為蜀虜矣齡石從之諸將以
水北城地險兵多欲攻其南城齡石曰今屠南城不
足以破北若盡銳以拔北城則南城不麾自潰矣秋
七月攻北城克之斬侯暉譙詵 平模今彭山縣
譙撫之屯牛鞞譙小苟塞打鼻臧熹擊撫之斬之小苟
聞之亦潰

牛鞞今簡州陽安縣此中水所經由也打鼻寰宇記

彭山縣有鬲鼻山亦名打鼻譙小苟所據也

譙縱棄成都朱齡石入成都縱自殺獲譙道福於獠中
斬之

蜀鑑卷五

欽定四庫全書

蜀鑑卷六

宋 郭允蹈 撰

氐羗楊氏據武都

晉惠帝元康六年畧陽氏羗楊茂搜保仇池

初畧陽清水氏楊駒始居仇池仇池方百頃其旁平地二十餘里四面斗絕而高為羊腸蟠道三十六回而上至其孫千萬附魏封為百頃王千萬孫飛龍復

強盛徙居畧陽飛龍以其甥令狐茂搜為子茂搜避
齊萬年之亂十二月自畧陽帥部落四千家還保仇
池自號輔國將軍右賢王 仇池在今成州即武都
地

愍帝建興二年楊難敵楊虎攻漢中刺史張光子孟萇
死之梁州人張咸起兵逐難敵

元帝建武二年氐王茂搜卒長子難敵立

茂搜長子難敵與少子堅頭分領部曲難敵號左賢

王屯下辨堅頭號右賢王屯河池 下辨今成州河
池今鳳州

永昌元年趙王劉曜擊楊難敵難敵逆戰不勝退保仇
池難敵稱藩於趙

明帝太寧元年楊難敵與弟堅頭奔漢中趙遣擊之以
田崧鎮仇池難敵請降於蜀難敵還武都

秦州刺史陳安據隴右趙主曜擊殺之難敵懼奔漢
中曜以田崧鎮仇池難敵既送降遂還武都據險不

服雄遣李稚出白水李壽出陰平以擊難敵難敵遣
兵拒之壽不得進李稚及李瑒長驅至下辨難敵遣
兵斷其歸路四面攻之稚瑒深入無繼皆為難敵所
殺

太寧三年楊難敵襲仇池克之殺田崧

咸和咸和二年趙朗襲楊難敵於仇池弗克

朗掠三千戶而歸

咸和六年蜀李壽攻陰平武都楊難敵降之

咸和九年仇池王楊難敵卒子毅立

毅自稱左賢王下辦公以叔父堅頭之子盤為右賢
王河池公遣使來稱藩

咸康四年仇池氏楊初襲殺毅自立為仇池公

初毅族弟稱臣於趙

穆帝永和九年秦攻楊初於仇池為初所敗

永和十一年楊毅弟宋奴刺殺楊初初子楊國殺宋奴
自立為仇池公桓溫表國為鎮北將軍秦州刺史

永和十二年仇池公楊國從父俊殺國自立國子安奔秦

升平四年仇池公楊俊卒子世立

海西公太和三年楊世稱藩于晉以世為秦州刺史

以世弟統為武都太守世又稱臣於秦

太和五年楊世卒子纂立

世始與秦絕叔父武都太守統與之爭國起兵相攻簡文帝咸安元年秦西縣侯雅楊安姚萇等伐仇池楊統

帥武都之衆降纂亦降秦以統為南秦州刺史

秦西縣侯雅楊安姚萇等伐仇池楊纂帥五萬之衆拒之晉梁州刺史楊亮遣兵助纂與秦兵戰於峽中纂兵大敗纂收散兵遁還西縣侯雅進攻仇池楊統帥武都之衆降秦纂懼面縛出降雅送纂於長安以統為南秦州刺史以楊安鎮仇池

孝武帝寧康元年晉梁州刺史楊亮遣其子廣襲仇池不克

廣與楊安戰兵敗沮水諸戍皆委城奔潰亮退守磬
險九月安進攻漢川

秦王堅伐蜀陷之以楊安鎮成都王統鎮仇池

太元十年楊定自稱仇池公

秦以楊定為雍州牧楊定徙治歷城置儲蓄於百頃
自稱龍驤將軍仇池公遣使來稱藩因其所號假之
其後又取天水畧陽之地

太元十九年楊定攻西秦兵敗死定弟盛稱仇池公遣

使稱藩

秦王苻崇為西秦王乾歸所逐奔隴西王楊定乾歸遣將殺定及崇定無子其叔父佛狗之子盛守仇池自稱征西將軍秦州刺史仇池公

太元二十一年封楊盛為仇池公

晉安帝義熙元年仇池王楊盛據漢中

譙縱反蜀大亂漢中空虛氐王楊盛遣其兄子平南將軍撫據之

秦伐仇池攻漢中拔成固楊盛請降於秦

秦徙流民三千餘家於關中

義熙三年楊盛遣苻宣入漢中刺史王敏攻之盛軍澧口敏退屯武興

盛復通於晉晉以大將軍授之澧口在陽平關武興今沔州

義熙十年後秦伐仇池不克

楊盛侵擾祁山秦主興遣趙琨等攻之姚恢入就鶩峽

姚嵩入羊頭峽胡翼度出汧城興自雍赴之天水太守王松念言曰先帝神畧無方再入仇池無功而還非楊氏智勇能全也直地勢險固爾使君具悉形便何不表聞嵩不從琨衆寡不敵為盛所敗

義熙十二年楊盛攻秦祁山拔之

宋武帝永初二年封楊盛為仇池王

宋文帝元嘉二年楊盛卒子玄立

盛聞晉亡不改義熙年號謂世子玄曰吾老矣終當

為晉臣汝善事宋帝及玄立使來告喪始用元嘉年
號

元嘉三年龐詒據武興楊難當將兵拒詒不克

難當玄弟

元嘉四年楊玄圍秦梁州刺史赫連輔政於赤水軍糧
盡民執輔政以降輔政至駱谷逃還 駱谷見上水經

注云駱谷水南逕仇池郡

魏封楊玄為南秦王

魏遣公孫軌齎策拜玄玄不出境軌責讓之玄懼而郊迎

元嘉六年楊玄卒弟難當廢其子保宗而自立

元嘉九年難當以保宗鎮宕昌以其子順守上邽保宗謀襲難當難當囚之

宕昌西羌國名今西和州界後五年釋保宗之囚使鎮董亭

楊難當遣司馬飛龍寇蜀遂陰平太守益州刺史劉道

濟擊斬之

益州刺史劉道濟聚斂刻虐流民許穆之變姓名稱
司馬飛龍自云晉室近親往依難當難當因民之怨資
飛龍以兵使侵擾益州道濟擊斬之蜀人趙廣等因
是為亂攻道濟以司馬飛龍為名後叅軍裴方明討
平之踰年而後定

元嘉十年楊難當襲漢中據之

梁秦刺史甄法護刑政不治失氐羌之和宋帝乃自

徒中起蕭思話代之楊難當因思話未至法護將下
舉兵襲白馬又攻葭萌法護棄城奔洋川之西城遂
有漢中之地 水經沔水注洋川者漢戚夫人所生
之地帝蠲復其鄉更名曰縣目曰洋川以表其祥

元嘉十一年蕭思話討楊難當破之復取漢中

蕭思話至襄陽遣蕭承之為前驅緣道收兵進據礮
頭難當焚掠漢中引衆西還留趙溫守梁州薛健據
黃金山思話遣陰平太守蕭坦攻鐵城戍拔之臨川

王義慶遣裴方明助承之拔黃金戍溫棄州城思話擊破之健甲子退保下桃難當遣其子和將兵與蒲甲子等共擊蕭承之相拒四十餘日蕭承之以稍擊之氏不能當走據大桃追之斬獲甚衆悉收漢中故地置戍於葭萌水甄法護賜死蕭思話徙鎮南鄭初盛據漢中刺史范元之等皆治魏興惟得魏興上庸新城三郡及索邈為刺史乃治南城為氏所焚故思話徙焉寰宇記云黃金城張魯所築水經漢水東逕小

大黃金南注云山有黃金峭水北對黃金谷有黃金
戍傍山依峭險折七里氏掠漢中阻此為戍與鐵城
相對一城在山上一城在下皆容百許人以其峻險
故以金鐵制名下桃城南城北城在城固皆今洋州
貢符縣地或言韓信所立或言張良創築葭萌水華
陽國志曰漢水有二源西源出隴西嶓冢山會泉逕
葭萌入漢

元嘉十三年楊難當自稱大秦王

改元建義然猶貢奉宋魏不絕其後復稱武都王

魏伐楊難當於上邽降之

楊難當據上邽魏遣師討之先遣崔曠齎詔書諭難當難當懼請奉詔攝上邽守兵還仇池難當以其子順為雍州刺史守下辨

元嘉十六年楊難當寇魏上邽

魏主以兩書責讓難當難當引還仇池

元嘉十八年楊難當寇漢川詔裴方明討之

難當傾國入寇謀據蜀土遣苻冲出東洛以禦梁州
兵劉真道擊冲斬之難當攻拔葭萌獲晉壽太守申
坦遂圍涪城劉道錫嬰城固守難當攻之十餘日不
克乃還詔裴方明討之

元嘉十九年裴方明克楊難當難當奔魏以楊保熾守
仇池

裴方明等至漢中與劉真道分兵攻武興下辯白水
皆取之楊難當遣苻弘祖守蘭臯使其子和將重兵

為後繼方明與弘祖戰於濁水大破之追和至赤亭
又破之難當奔上邽獲其兄子保熾又獲子虎送建
康斬之仇池平以胡崇之為北秦州刺史鎮其地立
保熾為楊玄後守仇池魏人迎難當詣平城真道方
明竟坐匿金寶馬下獄死 濁水水經注白水之異
名也

元嘉二十年魏擊仇池取之

楊保熾走

魏殺武都王楊保宗宋立楊文德為武都王屯葭蘆城
楊保宗謀叛魏魏河間公對鎮雒谷誘保宗送平城
殺之鎮東司馬苻達遂舉兵立楊文德為主據白崖
分兵取諸戍進圍仇池自號仇池公魏遣古弼擊楊
文德文德退走皮豹子督關中諸軍至下辯聞仇池
解圍欲還弼遣人謂豹子曰宋人耻敗必將復來軍
還之後再舉為難不如練兵蓄力以待之不出秋冬
宋師必至豹子從之魏以豹子為仇池鎮將楊文德

遣使來求援秋七月詔以文德屯葭蘆城武都陰平
氏多歸之 葭蘆水經注羌水又逕葭蘆城南寔宇
記在文州曲水縣城五十里

宋姜道盛楊文德合衆攻魏濁水城不克

魏皮豹子等救之道盛戰死

元嘉二十四年魏人擊楊文德敗走漢中

楊文德據葭蘆城招誘氏羌武都守五郡氏皆應之
魏仇池鎮將皮豹子帥諸軍擊之文德奔漢中宋人

削其爵土

元嘉二十七年取陰平平武郡以楊頭戍葭蘆

起楊文德為輔國將軍引兵自漢中西入搖動汧隴
陰平平武悉平梁南秦刺史遣文德伐啖提氏不克
執送荊州使文德從祖兄頭戍葭蘆

元嘉三十年蕭道成等帥氐羌攻魏武都魏鎮將苟莫
干將突騎救之道成等引還南鄭

孝武帝孝建二年以保宗子元和為征虜將軍楊頭為

輔國將軍

元和保宗子也宋以其幼弱未正位號部落無定主其族父頭先戍葭蘆母妻子弟並為魏所執而為宋堅守無貳心王玄謨請以頭為西秦州刺史安輯其衆俟元和稍長使嗣故業若其不稱即以授頭必能藩扞漢川使無敵患若葭蘆不守漢川亦不可立矣不從

明帝泰始二年以楊僧嗣為武都王

初武都王楊元和棄國奔魏從弟僧嗣復自立屯葭
蘆蕭惠開復遣兵至梁州楊僧嗣帥羣氏斷其道間
使以聞以僧嗣為武都王惠開自益州舉兵多任刑
誅蜀人猜怨合兵圍成都上赦其罪圍亦解

蒼梧王元徽元年楊僧嗣卒於葭蘆弟文度立降魏
魏以文度為武興鎮將

順帝昇明元年楊文弘襲仇池陷之魏皮歡喜等討之文
弘棄城走魏拔葭蘆斬文度以其弟文弘為武都王

魏皮歡喜拔葭蘆斬文度魏以楊難當族弟廣香為
陰平公葭蘆戍主仍詔歡喜築駱谷城文弘奉表謝
罪於魏遣子苟奴入侍

齊高帝建元元年魏葭蘆鎮主楊廣香降於齊

建元二年齊以楊難當之孫後起馬武都王鎮武興
武帝永明四年氏王楊後起卒種人集始立

集始文弘之子也後起弟後明為白水太守魏亦以
集始為武都王

永明十年楊集始寇漢中至白馬梁州刺史陰智伯擊破之

集始走還武興請降於魏

明帝建武二年魏圍蜀南鄭不克

魏仇池鎮將拓拔英圍南鄭梁州刺史蕭懿誘仇池諸氏斷其運道英全軍還

建武四年氏帥楊靈珍來降遣其弟襲武興王集始殺其二弟集同集衆集始亦來降魏遣李崇伐之克武

興楊靈珍奔齊

李崇槎山分道出氏不意表裏襲之羣氏皆棄楊靈
珍散歸崇進據赤土靈珍遣從弟建屯龍門自帥精
勇一萬屯鷲峽龍門之北數十里中伐樹塞路鷲峽
之口積大木聚礮石臨崖下之以拒魏兵崇命慕容
拒從它路夜襲龍門破之崇自攻鷲峽靈珍連戰敗
走獲其妻子遂克武興靈珍奔還漢中魏主聞之喜
曰使朕無西顧之憂者李崇也以靈珍為仇池公武

都王

齊東昏侯永元二年楊集始自齊降魏守武興

集始將衆萬餘自漢中北出規復舊地魏梁州刺史
楊椿遺集始書開以利害集始遂降魏魏人還其爵
位使守武興

梁武帝天監二年楊集始卒子紹先立

紹先幼國事決於二叔父集起集義

天監四年漢中太守夏侯道遷殺楊靈珍以漢中叛降

於魏

夏侯道遷為南譙太守奔魏魏使道遷從王肅鎮壽陽以道遷守合肥肅卒道遷棄戍來奔從梁州刺史莊丘黑鎮南鄭以道遷領漢中太守黑卒詔以王珍國為刺史未至道遷謀降於魏先是楊靈珍來奔以為假武都王助戍漢中有部曲六百餘人道遷憚之發兵擊靈珍父子斬之遂送於魏魏以邢巒都督梁益諸軍事魏擊諸城戍所向摧破晉壽太守王景胤

據石亭巒遣將擊走之巴西太守龐景民據郡不下
郡民嚴玄思附於魏攻景民斬之楊集起集義閭魏
克漢中而懼遂帥羣氏叛魏斷漢中糧道巒屢遣軍
擊破之梁遣孔陵戍深坑魯方達戍南安任僧褒等戍
石亭以拒魏邢巒遣王足將兵擊破之遂入劍閣陵
等退保梓潼梁州十四郡地東西七百里南北千里
皆入於魏 石亭水經注漢水逕西石亭 深坑在
今梁州北南安李膺記云宋置南安在今劔州成縣

南石同在利州西今名石同谿按南鄭非魏能取之乃夏侯道遷以之降魏也然魏得仇池則漢中亦漸孤矣

天監五年魏執楊紹先滅之置東益州

紹先稱帝集起集義稱王圍魏關城邢巒使傅豎眼破之克武興執楊紹先送洛陽楊集起集義亡走遂滅其國以為武興鎮又改為東益州按武都郡即

今階城鳳沔文五州之地也自晉惠帝元康六年丙

辰楊茂搜據之至梁天監五年丙戌為後魏所滅凡二百一十一年論曰蜀長江之上流也褒斜漢中蜀之門戶也武都又漢中之藩籬也江左君臣視蜀如土梗弁髦然自以為長江全勢無俟乎蜀也蜀與漢中置之度外而區區氐羌遂得以據四州之險歷二百年而后亡然無武都則無漢中無漢中則無蜀蜀非梁有一傳為陳而江左之勢孤矣已事之覆轍可不鑒乎雖然以武都四川之地而氐羌恃以立國者

二百年曾謂以吳蜀之全力而不能守乎

蜀刺史始不專用武人

齊武帝永明二年始以始興王鑑為益州刺史

晉代以來益州刺史皆以名將為之帝以始興王鑑為刺史先是劫帥韓武方聚黨千餘人斷流為暴郡縣不能禁鑑行至境上韓武方出降僚佐咸請殺之鑑曰殺之失信且無以勸善乃宥之於是巴面蠻夷為寇暴者皆望風降附鑑時年十四喜文學器服如

素士蜀人悅之 晉宋齊梁益州刺史 晉周撫

周楚撫之子 周仲孫 羅友 司馬軌之 鮑陋

宋張茂度 劉道濟激趙廣之變 甄灋崇 周

籍之 蕭惠開多任刑誅晉原一郡反 齊始興

王鑑年十四 劉俊為江淹奏贓貨鉅萬在益州置

金浴盆 梁劉季連反 魯休烈 鄧元起 蕭淵

猷 蕭淵藻 武陵王紀十七年 見於史者十九

人

論曰巽巖李氏曰自晉永和而桓溫始平李氏訖梁承聖而蜀乃盡入於周跨歷四代咸撫而有雖苻堅之侵陷譙縱之盜竊聲教暫阻而旋即討平其職貢於江東者年所居多而蜀士未有光顯者豈果無人當兩漢之際蜀人文章節義足以冠冕海內柱石帝京夫豈足用於兩漢而無用於晉宋齊梁者失在於不能招徠之也愚按蜀之士大夫狼狽於杜弢之流徙空虛於蠻獠之衝突非復兩漢之舊矣為益州刺

史者類無豈弟之政一始興王鑑乳臭少年粗好文
學而蜀人已歸之邢巒所謂蜀之民望文學風流亦
為不少率居山谷不獲仕進則流風餘俗豈盡泯哉
李文簡公之論其亦深究當時之實矣

魏邢巒謀代蜀

梁天監四年魏統軍王足進攻涪城

梁將魯方達王景胤等三十九人皆敗死蜀人震恐
益州城戍降魏者梁州東西七百里南北千里流

民自上名籍者五萬餘戶

魏梁州刺史邢巒上表請戍蜀不報魏王足奔於梁巴
西復降於梁

巒上表曰建康成都相去萬里陸行既絕惟資水路
水軍西上非周年不達益州外無軍援一可圖也頃
經劉季連反鄧元起攻圍資儲空竭吏民無復固守
之志二可圖也蕭淵藻羣屐少年未洽治務宿昔名
將多見囚戮今之所任皆左右少年三可圖也蜀之

所恃惟在劍閣今既克南安已奪其險據彼境內三分已一自南安向涪方軌無礙前軍累敗後衆喪魄四可圖也淵藻是蕭衍骨肉至親必無死理若克涪城淵藻安肯城中坐而受困必將望風逃矣若其出關庸蜀士卒驚怯弓矢寡弱五可圖也臣內省文吏不習軍旅賴將士竭力頻有薄捷既克重阻民心懷服瞻望涪益旦夕可圖正以兵少糧匱未宜前出今若不取後圖便難况益州殷實戶口十萬比壽春義

陽其利三倍朝廷若欲進取時不可失若欲保境寧
民則臣居此無事乞歸侍養魏主詔以平蜀之舉當
更聽後敕寇難未夷何得以養親為辭巒又表稱昔
鄧艾鍾會帥十八萬衆傾中國資儲僅能平蜀所以
然者闔實力也况臣才非古人何宜以二萬之衆而
希平蜀所以敢者正以據得要險士民慕義此往則
易彼來則難任力而行理有可克今王足已逼涪城
脫得涪則益州乃成擒之物但得之有早晚耳且梓

潼已附民戶數萬朝廷豈可不守又劍閣天險得而棄之良可惜矣臣誠知戰伐危事未易可為自軍度劍閣以來鬢髮中白日夜戰懼何可為心所以勉強者既得此地而自退不守恐負陛下之爵祿故也且臣之意算正欲先取涪城以漸而進若得涪城則中分益州之地斷水陸之衝彼外無援軍孤城自守何能復持久哉臣今欲使軍軍相次聲勢連接先為萬全之計然後圖功得之則大利不得則自全又巴西

南鄭相距千四百里去州迢遙常多擾動昔在南之日以其統綰勢難增立巴州鎮靜夷獠梁州藉利因而表罷彼土民望嚴蒲何楊非惟一族雖率居山谷而豪右甚多文學風流亦為不少但以去州既遠不獲進仕至於州網無由厠迹是以鬱快多生異途比道遷建義之始嚴玄思自號巴州刺史克城以來仍使行事巴西廣袤千里戶餘四萬若於彼立州鎮攝華獠則大帖民情從墊江已還不勞征伐自為國有

魏主不從先是魏主以王足行益州刺史梁遣張齊
將兵救益州未至魏主更以羊祉為益州刺史王足
聞之不悅輒引兵還遂不能定蜀久之足自魏奔梁
邢巒在梁州接豪右以禮撫小民以惠州人悅之巒
之克巴西也使軍主李仲遷守之仲遷溺於酒色費
散兵儲公事諮承無能見者巒忿之切齒仲遷懼謀
叛城人斬其首以城來降 南安今劍州普成縣涪
今綿州巴西縣晉穆帝永和中於梓潼郡僞置巴西

宋元嘉十五年割屬益州為巴西梓潼二郡治故涪
今名巴西縣

梁魏爭漢中

梁天監十三年魏遣高肇督步騎侵益州梁遣任大洪
禦之不克

肇將步騎十五萬命傅豎眼出巴北羊祉出涪城奚
康生出綿竹甄琛出劍閣游肇諫以為今頻年水旱
百姓不宜勞役往昔開拓皆因城主歸款故有征無

戰蜀地險隘鎮戍無隙豈得虛動大軍舉不謹始悔
將何及不從軍至晉壽蜀人震恐傅豎眼將步兵三
萬擊巴北梁遣任大洪自陰平間道入其州詔誘氐
羗絕魏運路會魏大軍北還大洪襲破魏東洛除口
二戍進圍關城豎眼遣姜喜等擊大洪大破之大洪
棄關城走還

天監十四年晉壽歸於梁

傅豎眼性清素民獠懷之元法僧代之素無治幹加

以貪殘王賈諸姓本州士族法僧皆名為兵葭萌民
任令宗因衆心之怨魏也殺晉壽太守以城來降民
獠多應之益州刺史鄱陽王恢遣巴西梓潼二郡太
守張齊將兵三萬迎之

天監十五年梁張齊圍武興魏擊敗之復取東益州

元法僧遣其子景隆將兵拒張齊齊與戰於葭萌大
破之屠十餘城遂圍武興法僧嬰城自守境內皆叛
遣使告急於魏魏遣傅豎眼赴之豎眼入境轉戰三

日行二百里九遇皆捷張齊退保白水梓潼太守苟金龍領關城戍主梁兵至其妻劉氏拒戰百有餘日梁兵遂退張齊復去白水侵葭萌傅豎眼敗之齊走還諸戍皆棄城走東益州復入於魏

普通六年梁蕭淵猷圍魏和安於小劍魏淳于誕擊敗之

淵猷圍和安於小劍遣其將樊文熾置柵於龍鬚山上以防歸路魏淳于誕焚其柵乘而擊之文熾大敗

僅以身免

大同元年梁鄱陽王範樊文熾圍晉壽魏東益州刺史傅敬和來降晉壽歸於梁敬和豎眼之子也

梁蘭欽引兵敗南鄭魏梁州刺史元羅降南鄭歸於梁自天監四年漢中入於魏凡三十年而歸於梁

梁簡文帝大寶二年魏侵梁南鄭

侯景之逼江陵也湘東王繹求援於魏命梁秦二州刺史宜豐侯循以南鄭與魏循不可魏宇文泰遣達

奚武取漢中循遣參軍劉璠求救於武陵王紀紀遣
潼州刺史楊乾運救之

梁元帝承聖元年梁遣兵救南鄭魏人敗之

楊乾運至劔北達奚武逆擊破之劉璠還至白馬西
為武所獲送長安宇文泰素聞其名待之如舊交時
南鄭久不下武請屠之泰將許之璠請之不許泣請
不已泰曰事人當如是遂從其請

梁州刺史蕭循以州叛降於魏

達奚武遣人入南鄭說蕭循曰足下所固者險所恃者援所保者民今險不足據援不可恃民不可保而宗國喪亂社稷無主欲誰為忠乎循乃請降魏賀蘭德願請攻之赫連達曰不戰而獲城策之上者豈可利其子女貪其貨財而不愛民命乎且觀其士馬猶強城池尚固攻之不克必彼此俱傷如困獸猶鬪則成敗未可知也武曰公言是也乃受循降獲男女二萬口而還於是劔北皆入於魏 自大同元年漢中

歸於梁歷二十七年而復入於魏

西魏尉遲迴取蜀

梁承聖元年武陵王紀稱帝於成都

紀在蜀十七年南開寧州越舊西通資陵吐谷渾內
修耕桑鹽鐵之政外通商賈遠方之利侯景之叛湘
東王繹起兵紀遂稱帝

承聖二年武陵王紀伐江陵魏尉遲迴伐成都以救之
紀帥諸軍東下留蕭撝守成都梁王繹甚懼與魏書

曰子糾親也諸侯君討之宇文泰曰取蜀制梁在茲一舉大將尉遲迴泰之甥也獨以為可迴曰蜀與中國隔絕百有餘年恃其險遠不虞我至若以鐵騎兼行襲之無不克矣泰乃遣迴自散關伐蜀


魏師圍成都武陵王紀還次於西陵紀衆敗梁主殺之成都降魏魏以尉遲迴為益州刺史

尉遲迴圍成都五旬蕭撫屢戰皆敗乃請降諸將欲不許迴曰降之則將士全遠人悅敗之則將士傷遠

人懼矣受之魏以廻為益州刺史 蜀自晉惠帝元
康八年戊午李特亂至梁承聖元年壬申入於西魏
凡二百四十五年

論曰蜀在江左歷晉宋齊梁君若存若亡者凡二百
年而夏侯道遷以漢中入於魏非魏能取之梁自亡
之也歷三十年據於魏而元羅又以漢中歸於南又
歷二十七年歸於梁而蕭循復以漢中入於北亦非
魏能取之梁自亡之也漢中既亡而魏人以涪城為

重鎮涪城今綿州武陵王紀空國東下尉遲迥擣虛
而來蕭撝遂以成都降矣豈迥之威武足以加蜀哉
蜀一也諸葛孔明以一隅之地抗衡中原而有餘江
左諸人以吳蜀之全保蜀而不足果在德不在險也



蜀鑑卷六

欽定四庫全書

史部
蜀鑑卷八七

詳校官編修_臣曹振鏞

編修_臣裴謙履勛

總校官檢討_臣何思鈞

校對官中書_臣宋鏞

謄錄監生_臣任紹濂

欽定四庫全書

蜀鑑卷七

唐明皇幸蜀

宋 郭允蹈 撰

唐玄宗天寶十五載帝出奔蜀

安祿山反哥舒翰敗績賊遂入關楊國忠首倡幸蜀之策上然之乃御勤政樓下制云欲親征聞者皆莫之信既夕命陳玄禮整比六軍厚賜錢帛選閑廐馬九百

餘足黎明上獨與貴妃姊妹皇子妃主皇孫楊國忠
韋見素魏方進陳玄禮及親近宦官宮人出延秋門
妃主皇孫之在外者皆委之而去

次于馬嵬楊國忠及貴妃楊氏伏誅

帝發馬嵬留太子東討賊

馬嵬驛在興平二十二里

帝至扶風

上至扶風士卒流言不遜會成都貢春綿十餘萬疋

至上命陳之於庭召將士諭之曰朕衰老託任非人
卿等從朕倉卒不得別父母妻子遠涉至此勞苦至
矣朕甚愧之蜀路阻長郡縣褊小人馬衆多或不能
供今聽卿等各還家朕獨與子孫中宮前行入蜀亦
自足達衆皆哭曰臣等以死從陛下不敢有二扶風
改為鳳翔郡

帝至散關

分扈從將士為六軍使潁王璠先行詣劔南壽王瑁

等分將六軍以次之

帝至河池郡

劔南節度使崔圓奉表迎車駕具陳蜀土豐稔

帝至普安房瑄謁見以瑄同平章事

普安今隆慶府

太子即位於靈武上皇至成都

江淮奏請貢獻之蜀之靈武者皆自襄陽取上津路

抵扶風

至德二載上遣太子太師韋見素入蜀奉迎上皇

冬十月上皇發蜀郡

上皇至鳳翔

上皇命悉以甲兵輸郡庫上發精騎三千奉迎

十二月丙午上皇至咸陽

論曰蜀叢爾一隅耳漢高帝以布衣特起項羽王之
漢中焚絕棧道示無還意矣徘徊南鄭鬱鬱不欲久
居明皇以英武之姿迺沉溺宴安召禍致寇不復堅

守京師狼狽奔蜀使非李郭諸人輔肅宗以歸關中
唐之宗社亦岌岌矣哉厥後德宗至興元而遽反中
和之駕留蜀者三年朱溫遂以篡唐唐人謂神堯以
一旅取天下而後世不能以天下取河北夫豈知河
北之失又基於明皇之棄京師而走蜀歟

高宗文討劉闢

順宗永正元年劍南西川支度副使劉闢自為留後
節度使韋臯薨闢久佐臯幕自為留後使諸將表求

節鉞朝廷不許以袁滋為西川節度使徵闢為給事中闢不受徵阻兵自守袁滋畏其強不敢進上怒貶滋吉州刺史以闢為西川節度副使知節度事憲宗以初嗣位未能討也諫議大夫韋丹上疏以為釋闢不誅則朝廷可以指臂而使者惟兩京耳此外誰不為叛上善其言以丹為東川節度使闢既得旌節志益驕求兼領三山上不許

劉闢圍東川節度使李康於梓州

憲宗元和元年以神策軍使高崇文將前軍兵馬李元奕將次軍山南西道節度使嚴礪討闢高崇文出斜谷李元奕出駱谷

上欲討闢而重於用兵公卿議者亦以為蜀險固難取杜黃裳獨曰闢狂慙書生取之如拾芥耳臣知神策軍將高崇文勇略可用願陛下專以軍事委之勿置監軍闕必可擒廼命高崇文將五千李元奕將二千與嚴礪同討闢高崇文屯長武城練卒五千常如

寇至卯時受詔辰時即行器械糗糧一無所闕崇文
軍至興元軍士有折人筋者崇文斬之以徇

劉闢陷梓州執李康嚴礪拔劍州斬其刺史文德昭

闢據劍閣以抗王師

高宗文入屯梓州斬李康以崇文為東川節度使

崇文引兵自閬州趨梓州闢歸李康於崇文以求自
雪崇文以康敗軍失守斬之嚴礪奏克梓州制削奪
闢官爵韋丹至漢中表言崇文客軍遠闕無所資若

與梓州綴其士心必能有功以崇文為東川節度使
劉闢城鹿頭關高崇文擊敗之又破闢於漢州嚴礪將
嚴秦破闢衆萬餘人於石碑谷

闢城鹿頭關連八柵屯兵萬餘人以拒崇文崇文擊
敗之闢置柵於關東萬勝堆崇文遣將高霞寓攻奪
之崇文又破闢於德陽又破之於漢州嚴秦破闢衆
萬餘人於綿州石碑谷 鹿頭關在漢州德陽縣萬
勝堆未詳

高宗文破劉闢衆萬人於玄武

詔凡西川繼援之兵悉取崇文處分 玄武今潼川

府中江縣

高宗文又敗劉闢於鹿頭關嚴秦敗劉闢之衆於神泉
於是闢綿江柵將李文悅鹿頭守將仇良輔皆以城
降於崇文士卒降者萬計

高宗文克成都擒闢檻送京師伏誅

崇文直指成都克之劉闢西奔吐蕃崇文使高霞寓

等追之及於羊灌田闢赴江不死擒之盧文若先殺妻子乃繫石自沉檻送京師斬之

以高宗文為西川節度使嚴礪為東川節度使

杜黃裳建議征蜀及指授高宗文方略皆合事宜於是始用兵討蜀以至威行兩河皆黃裳啓之也

論曰河北連衡屢拒朝命地險勢強誠未易支也區區之蜀豈得與之為比唐都關中蜀近在戶限之外徒以貞元姑息吐蕃陸梁韋臯得以久任者二十餘

年劉闢一狂生遽欲踵臯之轍自為留後此而不討
何以為國憲宗任杜黃裳為相天誅一加而威行兩
河偉哉

唐僖宗幸蜀

唐僖宗廣明元年黃巢入長安上走興元

黃巢趨長安既入城田令孜帥神策兵五百奉帝自
金光門出惟福穆澤壽四王及妃嬪數人從行百官
皆莫之知晡時賊前鋒入長安金吾將軍張直方帥

文武數十人迎於霸上上趨駱谷鳳翔節度使鄭畋
謂於道次請留鳳翔上曰朕不欲密邇巨寇且幸興
元徵兵以圖救復卿可糾合鄰道勉建大勲上至壻
水詔陳敬瑄諭以京城不守且幸興元若賊勢猶盛
將幸成都宜豫為備擬

帝至興元詔諸道出兵收復京師

中和元年春正月發興元至成都

陳敬瑄迎謁於鹿頭關至綿州東川節度使楊師立

謁見鄭畋遣其子凝績詣行在凝績追及上於漢州
車駕至成都館於府舍

鄭畋傳檄天下合兵討賊

時天子在蜀詔令不通天下謂朝廷不能復振及得
畋檄爭發兵應之

西川黃頭軍作亂討平之

黃頭軍使郭琪帥所部作亂命諸軍擊之琪夜突圍
出奔廣陵

殺左拾遺孟昭圖

田令孜用事昭圖上言曰天下者高祖太宗之天下非北司之天下天子者四海九州之天子非北司之天子北司未必盡可信南司未必盡無用疏入令孜屏不奏矯詔貶昭圖嘉州司戶遣人沉於墓頤津聞者氣塞而莫敢言 墓頤津在眉州眉山縣

中和二年邛州牙官阡能作亂押牙高仁厚討平之

陳敬瑄鎮西川多遣人歷縣鎮訶事謂之尋事多所

求取有二人過資陽鎮獨無所求鎮將謝弘讓邀之
不至自疑有罪夜亡入羣盜中而實無罪也捕盜使
楊遷誘而執之以求功敬瑄不之問釘於西城煎油
潑之備極慘酷邛州牙官阡能因公事違期亡命遷
復誘之能方出首聞弘讓之寃發憤為盜踰月衆至
萬人州縣不能制敬瑄遣楊行遷將兵數千人討之
官軍與戰不利恐獲罪多執村民為俘日數十百人
敬瑄不問悉斬之其中亦有老弱婦人或問之皆曰

我方治田績麻官軍忽入村繫虜以來竟不知何罪
蜀人羅渾擊句胡僧羅夫子韓求皆聚衆以應之阡
能入蜀州境陳敬瑄以押牙高仁厚為都招討指揮
使往伐之未發前一日執阡能之謀者仁厚溫言問
之皆曰某村民阡能囚某父母妻子而曰汝訶事得
實則免汝家不然皆死某非願爾也仁厚曰誠如是
我何忍殺汝汝歸但語阡能云高尚書來日發所將
止五百人無多兵也然我活汝一家汝為我潛語寨

中人云僕射閔汝曹皆良人為賊所制使尚書求汝
汝若投兵迎降當書汝背為歸順字遣汝復舊業所
欲誅者阡能等五人耳謀曰此皆百姓心上事尚書
盡知而赦之其誰不聽命遂遣之明日引兵發至雙
流周視槓柵怒曰重復牢密如此宜其可以安眠飽
食養寇邀功將斬之監軍力救僅免命悉平槓柵賊
伏兵千人於野橋箐以邀官軍仁厚詢知之引兵圍
之下令勿殺遣人釋戎服入賊中告諭賊大喜爭棄

甲兵請降仁厚悉撫諭之書其背使歸寨中餘衆爭出
降渾擎走其衆執之以來仁厚謂降者始欲即遣汝
歸為前諸寨未知吾心或有憂疑藉汝曹為我前行
過諸寨示以背字告諭之乃取渾擎旂倒繫之每五
十人授以一旂使前走曰羅渾擎已擒大軍行至汝
曹速如我出降立得為良人無事矣至穿口新津
延貢寨中皆爭出降執句胡僧斬韓求羅夫子奔阡
能寨與之謀悉衆決戰未定執旂先驅者至能欲出

兵衆皆不應。明日諸寨呼譟，爭出羅夫子自剄。衆挈其首縛旣能，驅之前迎官軍。見仁厚擁馬首大呼泣，拜曰：「百姓負寃日久，無所控訴。謀者還百姓引領，度頃刻如朞年。今遇尚書如出九泉，睹白日已死而復生矣。賊寨在他所者，分遣諸將往降之。」仁厚出軍，凡六日，五賊悉平。敬瑄梟二首於市，釘旣能羅渾擊句胡僧而尚之。旣能孔目官張榮屢舉進士，不中第，歸於能為之謀。主仁厚送府釘於馬市，自餘不戮一人。

敬瑄榜邛州賊黨皆釋不問未幾邛州刺史申捕獲
阡能叔父行全家請準法敬瑄以聞孔目官唐溪對
曰公已榜勿問而刺史復捕之此必有故今若殺之
豈非使明公失大信竊恐阡能之黨紛紛復起矣敬
瑄從之因問其故果行全有良田刺史欲買之不與
故陷之耳敬瑄召刺史將按之刺史以憂死他日行
全密餉溪金百兩溪怒曰此乃太師仁明何預吾事
汝乃懷禍相餉乎還其金斥逐使去

胡氏曰唐溪明足以昭姦智足以守信庶足以提身
若使處敬瑄之位阡能韓秀昇楊師立之禍無自起
矣由是觀之自古衰世人才之易地者豈特一唐溪
哉經世之人所以汲汲於求賢惟恐不聞良有以也
涪州刺史韓秀昇反高仁厚討平之

涪州刺史韓秀昇等聚眾寇江淮貢賦斷絕雲安涪
井路不通乏鹽敬瑄乃奏以高仁厚為行軍司馬將
兵三千以討平之 雲安今隸夔州涪井今長寧軍

中和四年東川節度使楊師立舉兵反詔以高仁厚為
留後將兵討平之以仁厚為東川節度使

高仁厚之討韓秀昇也陳敬瑄語之曰成功而還當
以東川相賞師立聞之怒舉兵反詔仁厚討之仁厚
屯德陽師立遣其將鄭君雄據鹿頭以拒之堅壁不
出仁厚列寨圍之夜二鼓君雄等出勁兵掩擊城北
副使寨楊茂言不能禦師衆走諸寨聞之皆走茂言
走至張杞追及之詰旦仁厚斬以徇仁厚圍梓州久

不下乃為書射城中遺其將士曰仁厚不忍城中玉石俱焚為諸君緩師十日使諸君自成其功數日鄭君雄斬師立出降詔以仁厚為東川節度使張杞在

潼川府

光啟元年車駕發成都三月至京師

光啟二年陳敬瑄殺東川節度使高仁厚

敬瑄疑仁厚欲去之會遂州刺史鄭君立起兵陷成都敬瑄遣其將李順之逆戰君立敗死敬瑄又發維

自
卷六
茂羗軍擊仁厚殺之 司馬公考異云張彭耆舊傳
不言仁厚所終惟數敬瑄六錯云太師殺高仁厚一
錯高僕射權謀智勇累有大功於太師又極忠孝若在
王司徒不過梓潼司徒謂王建也

論曰僖宗之幸蜀歷三年之久而叛者亦三起非一
高仁厚為之掃平則雖區區之蜀不容以一朝居也
愚觀仁厚忠誠智略雖古名將何以加諸嗚呼世運
雖衰而天之生才也未嘗乏當僖宗之時有鄭畋以

為相有仁厚以為將使二子得伸其志而敬瑄令孜不遂其姦則唐宗未至於不可支也觀仁厚之平阡能等吐露心腹於蚩蚩之氓而至於不戮一人亦可謂忠厚之至矣議者謂蜀民喜亂不為過乎彼唐溪卮州一孔目官耳其明智與廉為後世君子之所樂道而高仁厚之忠厚卓卓如此宋景文公乃略其事謂其不可與事天子惜夫

王建據蜀

唐僖宗光啟三年利州刺史王建襲據閬州

山南節度使楊守亮忌王建驍勇屢召之建懼不往
周庠說建曰唐祚將終立大功者非公而誰然葭萌
四戰之地難以久安閬州地僻人富刺史楊茂實不
修職貢若表其罪興兵討之可一戰而擒也建從之
召募溪洞酋豪有衆八千沿嘉陵江而下襲閬州逐
茂實自稱防禦使軍勢益盛

王建攻成都不克退保漢州

西川陳敬瑄懼王建與東川顧彥朗合謀圖己田令
孜曰建吾子也今折簡召之可致麾下遣使召之建
大喜帥精騎至鹿頭關敬瑄悔遣人止之建怒破關
而進敗漢州刺史張頊於綿遂拔漢州進軍學射山
又敗西川將句維立於蠶此又拔德陽顧彥朗以其
弟彥暉為漢州刺史發兵助建急攻成都三日不克
而退還屯漢州 學射山在成都蠶此屬新繁縣
文德元年王建攻彭山陳敬瑄救之而去

以韋昭度為西川節度使兼兩川招撫使

王建表請討陳敬瑄以贖罪因求邛州顧彥朗亦請
赦建罪移敬瑄他鎮以靖兩川上素惡田令孜憤藩
鎮跋扈會得彥朗建表以令孜所恃者敬瑄耳以韋
昭度鎮西川楊守亮副之王建軍新都綿竹土豪何
義陽安仁費師懃等擁兵自保皆附於建

以王建為永平軍節度使治邛州

割邛蜀黎雅置永平軍以建為節度使削奪陳敬瑄

官爵

昭宗大順元年王建攻邛州拔之

簡資嘉戎四州皆降又取蜀州

大順二年詔顧彥朗王建罷兵王建逐韋昭度還攻成都
周庠勸建請韋公還朝獨攻成都克而有之建從之
嚮其親吏昭度大懼以印節授建即日東還建送之
出劔門即以兵守之不復內東軍急攻成都環城烽
塹亘五十里

王建克成都自稱西川留後以王建為西川節度使

田令孜以印節詣建陳敬瑄開門納之建遂自稱成都留後徙敬瑄居新津以縣租賦給之

景福元年王建圍彭州

陳敬瑄以其將楊晟守彭州王建圍彭州踰年久不下民皆竄匿山谷諸寨日出俘掠有軍士王先成者新津人本書生也世亂為兵度諸將惟王宗侃晟賢往說之曰彭州本西川之巡屬也陳田以授楊晟使

拒朝命今陳田已平而晟猶據之州民皆知四川大府而司徒其主也故大軍始至民皆入山谷以俟招安今軍士掠之而司徒不恤彼將更思楊氏矣宗侃惻然不覺屢移其牀前問之先成曰又有甚於此者今諸寨旦出洵虜薄暮乃返曾無守備之意城中萬一有智者為之畫策伏兵門內俟洵虜者稍遠便出奮擊又於三面城下各出耀兵諸寨咸自備禦無暇相救能無敗乎宗侃矍然曰此誠有之將若之何先

成請條列為狀以白王建凡七條一乞招安山中百姓二乞禁諸寨洩虜三乞置招安寨選部將謹幹者執兵巡衛四乞招安之事願降帖付宗侃專掌五乞悉索所虜彭州百姓集於營場有父子兄弟夫婦自相認者即便送招安寨敢匿者斬六乞置九隴行縣於招安寨中撫理百姓給牒入山招其親戚七乞彭土宜麻民未入山多漚藏者宜令縣令曉諭各歸田里出而驚之以為資糧必漸復業建得之大喜即行之三日

民出山赴寨如歸市久之見村落無抄暴稍辭縣令復其故業月餘招安寨皆空

胡氏曰古人所以廣取士之路者為賢才難知恐其遺也取之廣然後賢才不在下而皆在上則下受其賜而亂無自起矣王茂先走卒也王建得之遂不用兵而下一州然則人才之隱伏于塵土草茅可勝計哉是宜表而用之俾盡見其所長而建不能宜所就之狹劣也

論曰昔先正呂汲公之叙華陽國志也其言曰自先漢至晉初踰四百歲士女可書者四百人可謂衆矣復自晉初至于周顯德僅七百歲而史所書無幾人忠魂義骨與遊塵野馬同没于邱原者多矣觀唐溪邛州一孔目官王先成彭州一軍士而致堂胡氏拳予而進之也如此蜀文才遺逸之久如汲公之言真可惜也

鳳翔節度使李茂真取興元楊守亮奔閬州

宦者楊復恭奔興元與山南節度使楊守亮拒王命
茂真討之遂取興元守亮等奔閬州茂真表其子繼
密知興元府事遂有漢中之地

王建遣兵擊楊守亮於閬州破之

大順二年王建殺陳敬瑄田令孜

建請於朝不許遂殺之

乾寧元年王建克彭州殺楊晟

建克彭州楊晟猶帥衆力戰刀子都虞侯王茂權斬

之獲其馬步使安師建建欲使為將師建泣謝曰誓
與楊司徒同生死不忍復戴日月再三諭之不從乃
殺之禮葬而祭之 晟今有廟在彭州後圃

乾寧三年荆南將許存降於王建更名宗播

荆南節度使成汭遣存沂江畧地以存為萬州刺史
存遂降於建

乾寧四年王建遣王宗侃攻渝州王宗阮攻瀘州取之
宗侃取渝州降刺史牟宗厚宗阮拔瀘州斬刺今馬

敬儒峽路通

王建遣華洪攻東川王宗謹敗鳳翔將李繼徽等於玄武

顧彥暉代其兄彥朗為節度使楊守亮嘗攻之求救於王建建嘗遣華洪救彥暉因而執之彥暉覺其謀至是彭州既平建乃謀東川 玄武今中江縣

鳳翔將李繼昭救東川留偏將守劍門王宗播擊擒之王建自將攻東川克之顧彥暉自殺

以張琳守成都更華洪姓名曰王崇滌朝廷遣使和
解兩川遇建於張杞塞建指執旗者曰戰士之情不
可奪也建與彥暉五十餘戰遂圍梓州用蜀州刺史
周德權策遣使諭以外無救援彥暉勢益孤知遂州
侯紹知合州王仁威鳳翔將李繼溥皆以援兵降於
王建建攻益急彥暉自殺城兵尚七萬人命王宗綰
分兵徇昌普等州以王宗滌為東川留後 彥暉兄
弟有廟在潼川府子城

論曰王建以盜賊之質乘陳敬瑄田令孜斗筲盜竊之時遂假王命以逐元帥楊晟顧彥暉獨撓其鋒以死拒之然晟蓋敬瑄之黨而彥暉亦欲為建者非果忠於唐也以區區之蜀連兵喋血數年乃定其禍也慘矣二州之人尸而祝之不亦異乎

天復二年王建取利州

西川兵至利州李繼忠棄鎮奔鳳翔王建以王宗偉守之

王建取興元

西川軍至興元李繼密戍三泉以拒之王宗播遂破
金牛黑水西縣褒城西寨王宗綰破馬盤寨繼密戰
敗奔還漢中西川軍遂乘勝至城下王宗滌帥衆先
登遂克之繼密請降遷於成都得兵三萬騎五千詔
以王宗滌鎮之宗滌有勇略得衆心王建忌之遂殺
之以王宗賀權興元留後 三泉今大安軍金牛黑
水西縣褒城馬盤並在今興元府

王建取洋州興州

李思敬以洋州降於建建攻拔興州以王宗浩為興州刺史

天復三年王建出攻秦隴遣判官韋莊入貢

建亦修好於朱全忠全忠遣押牙王殷報聘殷言蜀甲兵誠多但乏馬耳建作色曰當道江山險阻騎兵無所施然馬亦不乏乃集諸州馬大閱於星宿山官馬八千私馬四千部隊甚整殷嘆服建本騎將故得

蜀之後於文維黎茂州市邊馬十年之間遂及茲數
進王建爵蜀王

王建取夔忠萬施四州屯軍夔州

王宗本兵至夔州刺史侯矩以城降宗本遂定夔忠
萬施四州建復以矩為夔州刺史更姓名曰王宗矩
蜀之議者以瞿唐蜀之險要乃棄歸峽屯軍夔州

王建自光啟三年丁未據閬州反至天復三年癸亥
凡十七年然後取夔門盡有蜀地

天祐元年王建遣兵迎車駕

朱全忠劫上幸洛陽上遣間使以御札告難于王建
建遣王宗祐將兵會鳳翔至興平過汴兵不得進建
始自用墨制除官

五月趙匡凝攻夔州不克

匡凝鎮荆南遣水軍上峽攻夔州知渝州王宗阮擊
敗之萬州刺史張武作鐵絙絕江中流立柵於兩端
謂之鎖峽

王建與鳳翔李茂貞連和合兵討朱全忠

馮涓言於建曰梁唐虎爭勢不兩立若併而為一舉
兵得蜀雖諸葛復生不能敵矣鳳翔蜀之藩籬不若
與之和親無事則務農訓兵有事則觀釁而動可以
萬全建曰善乃與茂貞修好

天祐二年王建取金州馮行襲復取之

行襲奏金州荒殘乞徙理均州從之後數年桑弘志
又克之

天祐四年王建稱帝

岐蜀交爭

蜀永平元年岐攻興元唐道襲擊禦之

梁以僭號唐已亡矣今係以蜀

岐王使劉知俊李繼崇將兵擊蜀王宗侃等與戰於
青泥嶺蜀兵大敗王宗浩奔興州道襲奔興元先是
王宗綰城西縣號安遠軍宗侃宗賀等收散兵卒保
之知俊繼崇追圍之衆議欲棄興元道襲曰無興元

則無安遠利州遂為敵境矣吾必以死守之王宗播
將兵救安遠軍壁於庶讓之間與唐道襲合擊岐兵
大破之於明珠曲明日又戰於鳧口斬其成州刺史
李彥琛 青泥嶺在沔州長舉縣西縣屬興元王建
置安遠軍庶讓二水名南齊梁州記范栢年因出謁
宋明帝言及廣州貪泉因謂曰鄉州復有此否答曰
梁州惟有文川武鄉庶泉讓水曰卿宅何在曰在庶
讓間明珠曲未詳鳧口鳧谷水口也在今興元府庶

水縣

蜀主自將擊岐兵大破之

蜀主如利州命彭君集破岐二寨王宗侃在安遠遣人自中巴間行至泥溪見蜀主告急蜀主命王宗弼救安遠宗弼及劉知俊戰於斜谷破之宗弼敗岐兵於金牛拔十六寨俘斬六千餘級王宗播敗岐兵於黃牛川蜀主自利州如興元安遠軍望其旗王宗侃等鼓譟而出與援軍夾攻岐兵大破之拔二十一寨

岐兵解圍遁去

金牛屬大安軍黃牛川在南鄭縣

黃牛山下中巴在今巴州泥溪在利州西南今米倉

山間道也

蜀永平二年王宗汾攻岐文州拔之

永平四年蜀攻岐階州破長城關

永平五年蜀遣兵攻岐克階成秦鳳州

蜀遣王宗播攻秦州王宗瑤攻鳳州王宗翰引兵出

青泥嶺克固鎮與秦州將郭守謙戰於泥陽川蜀兵

敗退保鹿臺山王宗綰等敗秦州兵於金沙谷乘勝趨秦州王宗鐸克階州王宗綰克成州蜀軍至上染坊秦州節度使李繼崇奉牌印迎降王宗綰自河池兩當會王宗瑤攻鳳州克之泥陽水北出泥谷上染坊屬天水入阜郊堡南

通正元年蜀攻岐圍鳳翔

王宗綰舉軍出大散關大破岐兵俘斬萬計遂取寶雞王宗播等出故關至隴州李繼岌棄隴州奔於蜀

軍蜀軍進攻隴州會大雪蜀主召軍還 故關在隴

州隴安縣

先天元年蜀主建殂太子宗衍立

高季昌攻蜀

蜀王建永平四年荆南高季昌攻夔州不克

高季昌以蜀夔萬忠涪四州舊隸荆南興兵取之先
以水軍攻夔州刺史王成先逆戰季昌縱火船焚蜀
浮橋招討副使張武舉鐵絙拒之船不得進會風反

荆南兵焚溺死者甚衆季昌乘戰艦蒙以牛革飛石
中之折其尾季昌易小舟以遁荆南兵大敗俘斬五
千級

後唐取蜀

後唐莊宗同光三年唐遣魏王繼岌及郭崇韜伐蜀李
紹琛攻蜀威武城克之郭崇韜入散關

紹琛攻蜀威武城指揮使唐彥思等降得城中糧二
十萬斛紹琛縱其敗兵萬餘人逸去因倍道趨鳳州

李嚴飛書以諭王承捷李繼曠竭鳳翔蓄積以饋軍不能充人情憂恐郭崇韜入散關指其山曰吾輩進無成功不得復還此矣今饋運將竭宜先取鳳州因其糧乃倍道而進

王承捷以鳳興文扶四州降

得兵八千糧四十萬斛以承捷攝武興節度使

蜀主王衍東遊至利州遣王崇勳等將兵逆戰李紹琛等戰於三泉大破之

蜀主至利州遇威武敗卒始信唐兵之來乃以王崇
勲等為三招討將兵三萬人逆戰兵皆怨憤曰龍武
軍糧賜倍於他軍他軍安能禦敵紹琛等克興州與
戰三泉大敗之又得糧十五萬斛

蜀主王衍西走斷桔柏津命王宗弼守利州

李紹琛趨利州魏王繼岌至興州宋光葆及諸城鎮
皆降

蜀武德留後宋光葆以梓綿劔龍普五州王承肇以

洋蓬壁三州王崇威以梁開通渠麟五州階州刺史
王承岳以階州皆降其餘城鎮皆望風款附

安重霸以秦隴降王承休自文扶歸成都

王承休與安重霸在秦隴謀掩擊唐軍重霸曰擊之
不勝則大事去矣蜀天下險固唐兵雖勇安能直度
劔門耶然公受國恩聞難不可不赴願與公俱西承
休以為然重霸請賂羗人買文扶州路以歸承休使
重霸將龍武軍及所募兵萬二千人以從將行州人

餞於城外承休上道重霸拜於馬前曰國家竭力以
得秦隴若從開府還朝誰當守之開府行矣重霸請
為公留守承休無如之何遂與招討副使王宗汭自
文扶西南還蜀其地皆不毛羗人抄之且戰且行士
卒凍餒北至茂州餘衆二千而已重霸遂以秦隴來
降 寰宇記廢扶州在文州曲水縣今為鎮文州西
至扶州鎮審界一百三十五里舊屬隴西道松州都
督松州北至扶州三百里至吐蕃界五十五里南至

茂州三百里

高季興將水軍上峽取施州尋遁去夔忠萬三州遣使
詣魏王繼岌降

唐之伐蜀也亦命高季興充招討使季興常欲取三
峽畏峽路招討使張武威名至是乘唐兵勢自將水
軍上峽取施州張武以鐵鑠斷江路季興遣勇士乘
舟砍之會風大起舟絙於鎖不能進退矢石交下壞
其戰艦季興輕舟遁去既而聞北路陷敗夔忠萬三

州遣使詣魏王降

同光三年李紹琛入利州修桔柏浮梁

魏王繼岌至劍州

蜀武信節度使王宗壽以遂合渝瀘昌五州降

李紹琛至綿州浮馬渡江入鹿頭關進至漢州

紹琛進至綿州倉庫民居已為蜀兵所燔又斷綿江
浮梁無舟楫可渡紹琛謂李巖曰吾懸軍深入利在
速戰乘蜀人破膽之時但得百騎過鹿頭關彼且迎

降不暇若俟修繕橋梁必留數日或教王衍堅閉近
關折吾兵勢儻延旬浹則勝負未可知矣乃與嚴乘
馬浮渡江從兵得濟者僅千人溺死者六千餘人遂
入鹿頭關進據漢州

王宗弼差使勞軍且輸降款

魏王繼岌郭崇韜李紹琛李嚴等至成都蜀主王衍出
降

自出師至克蜀凡七十日王宗弼王承休伏誅莊宗

聞破蜀遣宦官向延嗣還上蜀簿得兵三十萬馬九千五百匹兵器七百萬糧二百五十三萬石錢一百九十二萬緡金銀二十二兩珠玉犀象二萬文錦綾羅五十萬疋莊宗曰人言蜀天下之富國也所得止於此耶延嗣因言蜀之寶貨皆入宗韜家

王建自光啟三年丁未入閬州至唐同光三年乙酉蜀滅凡三十九年

蜀鑑卷七